

երբ ճանապարհ ընկանք դեպի Աղթամար, ես խորին տհաճութեամբ էի գնում, թեև իմ դժկամութեան մասին Ասլանին ոչինչ չյայտնեցի:

Առաւօտից բաւական անցել էր, երբ հասանք Աղթամարայ «դրսի տունը». դա եւս Կտուց անապատի «դրսի տանէ նման գտնուում էր ցամաքի վրայ եւ բովանդակում էր իր մէջ վանքի ամբողջ տնտեսութիւնը: Չանագանութիւնը միայն նրանումն էր, որ Կտուց անապատի «դրսի տանէ մէջ կար եւ մի կրթարան, ուր նորընծայ արեղաները պէտք է տարիներով նախապատրաստողին, փորձողին եւ ապա վանքում ներս ընդունողին ու միաբանութեան կարգը մտնէին, իսկ այստեղ մի այդպիսի նախակրթարան չկար: Դա արդէն նշան էր, որ վանական կարգերը այստեղ այնքան խիստ չէին: Այստեղ «դրսի տունը» ծառայում էր միայն վանքի տնտեսութեան համար: Այստեղ բացի ամբարներից, ախոռատներից, մշակների ու հովիւների բնակարաններից, կային եւ մի քանի սենեակներ, յատկապէս կաթողիկոսի համար պատրաստած, ուր, երբեմն կղզուց դուրս գալով, նստում էր նա, ժողովրդի գործերին նայելու:

«Դրսի տանէ մէջ մեզ ասացին, որ կաթողիկոսը հազիւ թէ ժամանակ կունենայ մեզ ընդունելու, որովհետեւ նա պէտք է գնայ վանական մի կալուածքի վիճելի սահմանները որոշելու, որտեղ ներկայ կը լինի եւ տեղային գայմագամը: Մենք դիմեցինք դեպի կղզին նոյն փառաւոր նաւակով, որ պատրաստուած էր կաթողիկոսին դուրս հանելու համար:

Ծովը հանդարտ էր: Կղզին երեւում էր հեռոցից, կարծես թէ ներկուած լինէր բոսորային կարմրութեամբ: Արիւն էր հոտում այդ կղզին, արիւն... Արիւնով էին ներկուած նրա ապառաժները, սկսեալ այն օրից, երբ խստասիրտ Տիրանի դահիճները կոտորում էին Ռշտունեաց Չօրա նահապետի ազգատոհմը, չինայելով թէ կանանց, թէ մանկանց... Արեան գոյն էին ստացել արեգակի ճառագայթները, որ շողշողում էին կարմրագոյն ժայռերի վրա... Արիւնով էր ներկուած եւ հայրապետական աթոռը, որի վրայ բազմած էր եւ ներկայ կաթողիկոսը... Նրա նախորդը զոհ գնաց մի անյայտ եղեռնագործութեան...

Ես շատ բան էի լսել Ջօլամերիկի Մար-Շիմոնի մասին, յետոյ առիթ ունեցայ տեսնելու նրան: Կորդոաց լեռների այդ պատրիարք-դիւցազնը թողել էր իմ վրայ խորին տպաւորութիւն: Ես առաջին անգամ տեսայ մի կրօնական անձնաւորութիւն, որ միացրել էր իր մէջ հոգեւոր հայրապետի եւ մարմնաւոր իշխանի կոչումը, — որ մի ձեռքում խաչ, առաջնորդում էր իր ժողովրդին դեպի երկնայինը, դեպի հոգեւորը, իսկ միւս ձեռքում սուր, պաշտպանում իր ժողովրդին, երբ որեւէ վտանգ էր սպառնում նրան երկրային թշնա-